

**Lebih 30,000 Orang Dijangka Sambut Najib Di Gua Musang Jumaat
Bernama
03 Mei, 2012**

GUA MUSANG, 3 Mei (Bernama) -- Lebih 30,000 orang dijangka menghadiri Karnival Komuniti 1Malaysia Negeri Kelantan yang akan diadakan di padang Pusat Sivik Gua Musang di sini Jumaat, terutama bagi mendengar ucapan Perdana Menteri Datuk Seri Najib Tun Razak.

Menteri Penerangan Komunikasi dan Kebudayaan Datuk Seri Dr Rais Yatim berkata persiapan bagi menyambut kunjungan Perdana Menteri bagi merasmikan program itu berjalan lancar.

"Dengan kerjasama Anggota Parlimen Gua Musang Tengku Razaleigh Hamzah, kami menduga tidak kurang 30,000 hingga 35,000 orang akan bersama kita untuk menghayati bagaimana kerajaan bimbingan Datuk Seri Najib Tun Razak dapat membantu kita menjelmakan keharmonian dan kebolehan kita membantu orang yang perlukan bantuan," katanya.

Beliau berkata demikian kepada pemberita selepas menyaksikan raptai penuh majlis pelancaran Karnival Komuniti 1Malaysia Negeri Kelantan itu di sini, pada Khamis.

Rais berkata orang ramai akan berpeluang menyaksikan beberapa persembahan kebudayaan termasuk dikir barat, yang amat digemari oleh rakyat Kelantan.

Rais berkata Komuniti 1Malaysia adalah sebuah badan sukarela yang begitu produktif melaksanakan program membantu golongan miskin dan daif dan memupuk perpaduan kaum.

Sementara itu, mengenai Hari Kebebasan Akhbar Sedunia yang disambut hari ini, Rais turut mendoakan para wartawan dan penulis berada dalam keadaan sihat dan dapat menjalankan tugas dengan bertanggungjawab.

Katanya, ini adalah hari yang paling sesuai dengan Perkara 10 Perlembagaan Malaysia yang antara lain menyentuh mengenai kebebasan bersuara di mana di bawah Pertubuhan Bangsa-bangsa Bersatu (PBB) dan perkara 10 Perlembagaan Malaysia, ia bukan kebebasan mutlak tanpa had.

"Hadnya adalah hak asasi orang lain dan hak asasi yang ada pada perkara 10 dan undang-undang negara kita.

"Selagi mereka menghormati undang-undang negara kita, maka selagi itu hak kebebasan mereka, dapat kita jamin," katanya.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=663631>